

Cijvaiz Mizyungh Lai

□ Mungz Cwngzgen/蒙成建

Gou ngamq ciep vunz guenj aen ban ndeu, baez daih'it bae hwnjdangz, couh fatyienh ndaw ban Siujcouh hwnjdangz mbouj ciensim, gyaез gauj siujdungcoz mbouj duenh. Yienghneix gou byaij daengz henz ndang Siujcouh, lumhlumh aen' gyaеuј de, laeglemx naeuz de nyinhcaen dingq goq. Siengj mbouj daengz gou aen hengzdoengh neix, yinx gyoengq hagseng wnq cungj ndaq Siujcouh.

"Lauxsae, Siujcouh hwnjdangz cungj mbouj haeujsim, maij loengh fwngz." "De guh cozyez mbouj ciuq-seiz guhsat, gaujsi coengzlaiz mbouj gizgwz." "Lauxsae, de baklai, hawj de gag naengh ba." Daihgya cungj gangj Siujcouh mbouj ndei, lumjbaenz Siujcouh dwg "duzmax haih doih" ityiengh, caiq yawj Siujcouh, de mbouj oksing mbouj gangjvah, boemzbub lwgda, lwgfwngz mbouj dingz nu naenx gokbuh. Gou siengj, moix boux hagseng majhung cungj miz menh miz vaiq, hojnaengz Siujcouh ciepsouh lai menh di. Ndigah youq ndaw saedceij ndawde, gou dinghdingh gvansim de.

Miz ngoenz ndeu cuengqhag, gou cingq roengz laeuz, Siujcouh sawqmwh daj baihlaeng mauhgvaq gou, gip-muengz roengz laeuz bae, "Lauxsae caiqraen." De dongx gou. De buet ndaej gig vaiq, gou mumjgyumq raen ndaw aendaeh henz daehsaw de, miz aen bingzraemxmbouq ndeu, ndawde cang miz gij raemx haunya.

Gou haenq sing heuh de, cam: "Siujcouh, ndaw bingz cang gijmaz ha?"

"Cang cijvaiz." De doq buet doq han.

"Yo, mwngz vihmaz mbouj gwn cijvaiz ne?" Gou ngeizvaeg le couh

cam.

"Dawz dauqbae hawj daegnuengx gou gwn." De han naeuz.

Gou sawqmwh mizdi gamj-doengh, Siujcouh miz gezdenj caiq lai, de ceiқ noix miz aen youhdenj ndeu, couhdwg caensim gyaез daeg-nuengx, gou lumjbaenz ra ndaej le giz hainduj gaijbienq de.

Haet laeng, gou daegdaengq dangqnaj vunzlai cam Siujcouh: "Hagdangz fat cijvaiz hawj moix boux vunz, mwngz mbouj gwn cungj dwg louz hawj daegnuengx ha?"

"Dwg ha, moix ngoenz gou cungj daiq baema hawj daegnuengx gwn." Siujcouh mizdi mbouj ndei eiқseiқ naeuz.

"Mwngz caen gyaез daegnuengx, dwg daeggo ndei. Mwngz dwg daeggo ndei, hix itdingh ndaej dang boux hagseng ndei, lauxsae saenq mwngz." Gou riu naeuz.

Siujcouh riu dwk mizdi naj-nyaenq, seizneix gou cazyawj gij fanjwnq gyoengq hagseng wnq, gij lwgda gyoengqde daj ngeizvaeg cugciemh bienqbaenz haenhndei, gou siengj wnggai dwg doiқ Siujcouh yawjap mizdi gaijbienq.

Cingqngamj ngoenzde lajbyongh-ngoenz miz boux hagseng ndeu mbouj gwn cijvaiz, soengq hawj gou, gou mbouj gwn, cix caegcaeg heuh Siujcouh daeuj daengz baihnaj gou, sing daemq naeuz: "Siujcouh, gwn faenh cijvaiz mwngz bae, bingz cijvaiz neix mwngz daiq baema hawj daegnuengx mwngz gwn, ngoenzcog geiqndaej daiq bingz dauqdaеuј bw." Siujcouh ngaekngaek gyaеuј, cieп gvaq bingzciјvaiz oet roengz ndaw daehsaw bae, de mbouj gangj docih, hoeng gou roxninh daengz de docih



gou.

Youq ndaw saedceij, cijaeu miz gij cijvaiz lai okdaeuj haenx, gou cungj caegcaeg louz bingz ndeu hawj Siujcouh daiq baema, ngoenz daih-geih dawz bingz dauq, de mizseiz daiq miz geij aen lwgmaenz roxnaeuz geij faek haeuxyangz hawj gou, gou cix gaemdawz gihvei cam de guh cozyez baenzlawz yiengh, bang de genjcaz cozyez, dazyinx de coiHgaij cozyez. Yienghneix doxyau roengz-daeuj, gou caeuq Siujcouh gvanhaeh yied daeuj yied ndei, de bienq ndaej ndiepgyaез hagsib lo, cozyez cizlieng onjbouh daezswng, gou ciengzseiz youq gwnz ban haenh de. Souh gou yingjyangj, gij doengzhag de hix hainduj doiқ de miz yawjap ndei lo.

Miz gienh saeh ndeu sawj gou

geizheih, baez hwnjdaiz aеu bak gangj faenzcieng, Siujcouh boux daih'it cawjdoengh yaengx fwngz hwnjdaiz gangj, de mizdi gaenjcieng, itmienh gangj itmienh yawj gou. Gou youq mbiengj ndeu riunyumnyum yawj de, youq mwh de gangj mbouj roengzbae haenx coengh mbat ndeu, de cungj-suenq gangj sat lo. Mboujguenj gangj ndaej baenzlawz yiengh, hix suenq dwg bien faenzcieng bakgangj caezcingj ndeu lo, de ngoenzneix rox cawjdoengh hwnj daiz bae baijyienj swheij, gaenq dwg ngeix mbouj daengz, gou coh de daengj hwnj lwgfwngzmeh.

Seizneix gou daegbied maq-muengh Siujcouh gvaqlaeng biujyienh lai ndei dem, "Siujcouh, mwngz itdingh mbouj hawj gou saetmuengh." Gou youq ndawsim gag niemh.



Golinxvaiz

Mbouj miz saek mbawfaex.

Duj ndeu, song duj, sam duj……ndokva ok ndok gyaеuјdei raixcaix.

Dwg bouxlawz, vihmaz, mbaet mbaw mwngz seuq bae ne?

De yaek hawj mwngz mbouj miz mbaw dai bae ha?

Mwngz lij lix youq.

Hoeng, mwngz guhlawz mbouj miz mbaw goj lix ndaej ne?

Dwg yaek ok ndokva gyaеuјdei baenzneix, dwg lwi?

Ndokva gyaеuјdei raixcaix hawj haulai vunz angqmaez, hawj haulai vunz gyaеuјmaiј, dwg lwi?

(Daj《Bonjsei Sim Lwgnyez》(Veiz Gizlinz raiz) senj okdaeuj, Lwgfwngzmeh/卢奋长 hoiz)